

HUGHES, ROBERT ('Robin Ddu yr Ail o Fôn '; 1744 - 1785), bardd

Enw: Robert Hughes
Ffugenw: Robin Ddu Yr Ail O Fôn
Dyddiad geni: 1744
Dyddiad marw: 1785
Rhyw: Gwryw
Galwedigaeth: bardd
Maes gweithgaredd: Barddoniaeth
Awdur: Griffith Thomas Roberts

Ganwyd yn y Ceint Bach, Penmynydd, Môn. Addysgwyd ef gan Ellis Thomas, curad Llanfair Mathafarn Eithaf, a hyfforddwyd ef fel clerc cyfreithiwr yn swyddfa Emrys Lewis y Trysglwyn, yn Biwmares. Bu'n cadw ysgol ym Mhenmynydd, Hen-eglwys, Cerrig-ceinwen, Bodedern, ac Amlwch, a bu'n glerc i Ratcliffe Sidebottom, bargyfreithiwr, Essex Court, Temple, Llundain, o 1763 hyd 1783. Ei batrwm fel bardd oedd [Goronwy Owen](#). Cyhoeddwyd ei gywydd ' Molawd Môn' yn [Diddanwch teuluaidd](#) [↗](#), 1763, a'i gywydd 'Y Byd' yn *Y Cylchgrawn Cymraeg*, 1793. Ei waith gorau yw ei gywydd 'Myfyrdod y Bardd am ei Gariad,' a gyhoeddwyd yn y *North Wales Gazette*, 15 Medi 1808. Yn Llundain bu'n aelod amlwg o'r cymdeithasau Cymraeg, yn gydlyfrgellydd â [Richard Fenton](#) i Gymdeithas y Cymmrodorion yn 1777, yn un o sylfaenwyr Cymdeithas y Gwyneddigion ac yn ysgrifennydd a thrysorydd iddi am dair blynedd, 1771-3, ac yn llywydd iddi yn 1778. Cynorthwyodd '[Owain Myfyr](#)' i gasglu gweithiau y beirdd i'w cyhoeddi. Collodd ei iechyd yn Llundain a daeth i Gaernarfon i gadw ysgol yn 1783. Bu farw 27 Chwefror 1785, claddwyd ef ym mynwent Hen-eglwys ger Llangefni, a chymerodd Cymdeithas y Gwyneddigion y draul o osod carreg goffa ar ei fedd.

Awdur

Griffith Thomas Roberts

Ffynonellau

Bulletin of the Board of Celtic Studies, vi, 1-24; vi, 231-52; vli, 260-9

Leathart, *Origin and Progress of the Gwyneddigion Society of London* (London 1831), 11, 31

Y Cymmrodor, 1951

Darllen Pellach

Erthygl Wikipedia: [Robert Hughes](#)

Dolenni Ychwanegol

Wikidata: [Q17307366](#)

Dyddiad cyhoeddi: 1953

Hawlfraint Erthygl: <http://rightsstatements.org/page/InC/1.0/> [↗](#)

Mae'r Bywgraffiadur Cymreig yn cael ei ddarparu gan Lyfrgell Genedlaethol Cymru a Chanolfan Uwchefrydiau Cymreig a Cheltaidd Prifysgol Cymru. Mae ar gael am ddim ac nid yw'n derbyn cymorth grant. Byddai cyfraniad ariannol yn ein helpu i gynnal a gwella'r wefan er mwyn i ni fedru parhau i gydnabod Cymry sydd wedi gwneud cyfraniad nodedig i fywyd yng Nghymru a thu hwnt.

Ewch i'n [tudalen codi arian](#) am ragor o wybodaeth.

